



Conception, naissance & nourriture de Samson, & sa force merueilleuse.

Ly auoit vn homme de Saraa, de la lignée de Dan, nommé Manué, qui auoit sa femme sterile, à laquelle l'Ange du Seigneur s'apparut, & luy dit : Tu es sterile, & sans enfans ; mais tu conceuras & enfanteras vn fils, duquel le rasoir ne touchera la teste : Car il sera le Nazaréen de Dieu dès son enfance, & dès le ventre de sa mere, & il commencera à deliurer Israël de la main des Philistins. Ce qu'ayant sceu Manué, & parlé aussi à l'Ange, il prit vn chevreau, & des choses liquides, & les mit sur la pierre en les offrant au Seigneur ; & luy & sa femme regardoient : & comme la flamme de l'Autel montoit au Ciel, l'Ange du Seigneur ensemble monta en la flamme : & quand Manué & sa femme le virent, ils cheurent prosternez en terre. Ainsi la femme de Manué enfanta vn fils & le nomma Samson, & l'enfant deuint grand, & le Seigneur le benit. Il prit à femme vne fille des Philistins en Thamnata, lesquels en ce temps dominoient sur Israël. Il descendit avec son pere & sa mere en Thamnata : sur le chemin vn Lyon s'apparut cruel & rugissant, & vint au deuant de luy, & l'esprit du Seigneur entra dans Samson, & déchira le Lyon ainsi qu'un chevreau par pieces. En la gueule du Lyon mort les mouches firent du miel, dont Samson mangea, & en donna vne partie à son pere & à sa mere, sans declarer où il l'auoit pris.